

Mitaki Tugi e Tāoga Niue!

Tohia e: Sariah Magaoa

Puipui e Tāoga Niue!

Leveki e Vagahau Niue!

Tānaki e Tau Tufuga!

Ke hoko atu ke he taha hau mo e taha hau!

Fakaalofa lahi atu ma Niue fekai! Fakamua fakaaue ke he ha tautolu a Matua ha ha he Lagi ha ko e Haana takitakiaga mafola kua maeke a tautolu ke fakalataha auloa ai ke he aho mahuiga nei. Lahi e haaku a fialia mo e fakaaue ke he ha tautolu a Lilifu Palemia ko Sir Toke Talagi ha kua foaki mai e kotofaaga nei ke eke au mo hukui ke he tau atu fuata ha Niue. Manatu au ke fakaaue atu foki ke he ha mautolu a ulu aoga he Aoga Tokoluga Niue ko Charles Ioane ha ko ia ne omoi mai e kotofaaga nei.

Tuga ni he kitia mo e iloa e tautolu, to lahi e mahuiga e aho nei. Nakai ni ko e aho ke fakamanatu e tu 44 e tau tau he Pule Fakamotu, ka e koe aho foki ke fakatu e fakafouaga mo e hafagiaga he Fale he Tāoga Niue. Tau matapatu manatu kua lata ma e aho nei ke fakamua, tānaki. Ke uaaki, leveki. Ke toluaki, Puipui e Tāoga Niue.

Ko tautolu e atuhau tupuhake kua lata ke mata lahi mo e leveki ha tautolu a tāoga motu. Kia tāpiki mau mo e ofaofa ha tautolu a tau tufuga fakamotu ka e mua atu ke he Vagahau FakaNiue. Ko e Vagahau Niue ko e alito, ko e koloa uho, ko e hoko tua he tagata Niue. Ko e mena ha ia kua fakaohoho atu e au ko e fuata ke he ha tautolu a atuhau ke fakaako fakalahi mo e fakamalolo ke atihake ha tautolu a Tāoga Niue. Ko e ha tautolu a gahua ha nei kua lata ke fakagahua mo e fakaaoga ke he tau magaaho oti.

Tuga ni he kitia he tau tupuna mo e tau mamatua ha tautolu, ko e atuhau nei kua fano ki noa e tau mahani; tuga e Vagahau Niue, tau puhala ke taute e tau gahua he kaina mo e nakai fai fakalilifu ke he tau momotua. Ole atu au ke he atuhau tupuhake, ko tautolu, ke mahani makaukau mo e makaka, mo e foli ke fakaako, fakakite, mo e fakaaoga e tau tufuga he ha tautolu a motu. Nakai ni kia tautolu e atuhau ka e kia tautolu oti e tau tagata Niue.

Ke he atuhau tupuhake, kia foli fakalahi a tautolu ke fakatu tokoluga e Tāoga Niue ha tautolu. Ma Niue na e, kia tāpiki mau, kia tānaki, leveki, puipui mo e ofaofa ha tautolu a Tāoga Niue ke lata ai ma e taha atuhau ke he taha atuhau. Holo ki mua mo e tufuga Niue! Holo ki mua mo e Vagahau Niue! Holo ki mua mo e Tāoga Niue! Kia monuina e 44 he tau tau he Pule Fakamotu ha Niue.

Mitaki tugi e mafola! Mitaki tugi e Pule Fakamotu! Mitaki tugi e atuhau tupuhake! Mitaki tugi e Tāoga Niue!

Fakaaue Lahi Mahaki kua fanogonogo mai!